

## Stadtarchiv Dornbirn, Urkunde Nr. 511

### Rückseite:

No. XII

Zinsbrief von Marcus Wehinger Gegen Hansen von Embs umb 1lbd  
1538

### Vorderseite:

Ich Marcus Wechinger zu Thorenbüren gesessen Bekenne öffentlich mitt disem Brief für mich unnd all min erben das ich mitt guter vorbetrachtung unnd mit wohlbedachten sinn unnd mutt Recht unnd Redlich ains stetten Ewigen Khaufs hiemitt wissentlich In Craft diß Briefs zu Khaufen geben han dem Edlenn unnd vesten Junckher Hansen von Empz der Hohen Empz unnd allen sinen Erben unnd nachkhomen ain pfund pfennig Rechtz stetz Jerlichs unnd gewyß Ewigs Zins von usser unnd ab minem aigen Huß und Hostat Im oberdorf gelegen stost oban an Felix Diemen neben zu an urichen Wechinger unna an min aigen gut zum vierden an den Kilchweg vormals fry ledig unnd losz unnd ist dieser Ewig khouf beschechen unnd volfür worden umb zwainzig pfund pfennig guter muntz unnd lands werung deren Ich also, bar von lme uß gericht unnd bezahlt bin nach minem besten nutz unnd willen also sollen unnd wellen Ich unnd all min Erben unnd alle die dises hierinnen verschriben underpfand khünftig fürhin Innhabern dises hierinnen begriffen pfund pfennig Jerlichs zinß daruß unnd darab hinfüro Ewigklich unnd Jerlich unnd auch yedes Jars allein unnd besonder allwegen uff Sant martis tag acht tag vor ald nach ungefarlich tugenlich unnd gütlich Richten unnd geben unnd zu des gedachten Junckher Hansen von Empz im unnd siner Erben sichern Handen antwurten one alle minderung unnd abgang Costen unnd schaden unnd auch für allermenigklichs Entweren in allweg im unnd so unnd wann Ich oder min Erben hierumen Sümig würden unnd disen Zins nit geben tun all wyß unnd mauß wie obstat so sind unnd hayssend diese hierinnen begriffnen underpfand Zins fellig unnd zu Rechten Ewigen aigen gefallen unnd verfallen dem gedachten Junckher Hansen im unnd allen sinen Erben unnd nachkhomen also das sy es fürhin Ewigklich sollen unnd mögen Inhabern buwen nutzen niessen versetzen verkhoufen unnd damitt schaffen handeln thun unnd laussen als mit anderen Irem aigen gut one min mins Erben noch mengklich von unsern wegen Sumen noch Irren in khainerlay wyß noch weg Es sollen und wellen auch ich unnd all min Erben hieruff disz khaufs Recht gut getrűw weren hayssen unnd sin für all abgeng Irrung unnd Infell nach dem Rechten allfelt In unseren Costen unnd one Irn schaden unnd wie wol dieser Brief ain Ewigen khauf wyset ist mit dennocht die genad beschechen das ich unnd min Erben disen zins wol wider abkhoufen mögen halb oder gar zumal hinfür wann wir wellen doch mit dem Hauptgut unnd belofnen Zins unnd uff bestimpten Sant martis tag wann mit Irrung in der muntz ist unnd des alles zuwaren vesten urkhund so han ich marcus wechinger mit Ernst Erpetten der Ersamen marti meser an der zit Amann zu thorenbüren das er sin aygen Insigel öffentlich hatt gehenckt an disen Brief für mich unnd all min Erben doch Im unnd sinen erben one schaden der geben ist uff mitwoch nechst nach Sant Sebastianus tag nach Cristus gepurt gezelt fünfzehenhundert dreyssig unnd acht Jar